

Iwwer die Omsele

Om letzte Sunndaachowend, bei dem scheene Wedder, habb ich unne im Stadtgatte uff de Bonk gesotze unn habb de Omsele zugeheert, die doo su schee singe. Wie ich doo so sitz, die Aache zu unn die Ohrn uff, tippt merr ooner uff die Schulter unn vor merr steht de Hubert unn sacht: Hallo, Hannes, schönes Wetter heute, nicht wahr? Aber warum hast du die Augen zu, ist dir nicht gut?

Naa, sach ich, awwer wenn ich die Aache zu habb, kann ich besser heern.

Und, froocht de Hubert, was hörst du?

Ich heer die Omsele singe.

Moont de Hubert: Andere Sorgen hast du nicht?

Doo gebb ich em zur Ondwort: Ach waaßde, es gibt nit mehr so vill Omsele. Die Alte wernn von de Katze gefresse, die Junge von de Atzele, unn allminonner wernn se von de Audos dotgefahrn. Ja, unn wensn koo mehr gibt, dann kenne se aach nit singe. Dess macht merr schunn Sorche.

Hannes, de Hubert guckt mich gonz schepp oo unn setzt sich dann newer mich: Hannes, am Donnerstag hat der Krieg im Irak begonnen - und du sitzt hier und machst dir Gedanken über die Amseln? Mach' dir Gedanken über all die unschuldigen Menschen, die in diesem unsinnigen Krieg jetzt sterben müssen.

Doo sach ich: Also sollde so Omsele die Audos iwwerlewe, dann baue se ihr Nest doohie, wo jed Raubzeich droo kimmt, unn wennse die Junge ausgebrüt hawwe, dann warte die Atzele schunn unn gucke, wo die Alde zum Fittern hiefliche unn dann machense hinnerher, finnes Nest ...

Hannes, will mich de Hubert unnerbreche.

... unn räuwerns aus, die losse koons von dene Junge iwwerich. Unn kimmt doch emol e Brut dorch, dann sitzt e Katz schunn unnerm Busch unn wart, bis die Junge aus em Nest hippe unn – zack!

Hannes! Ich ..., will merr de Hubert schunn widder ins Wort falle.

Ich schittel de Kopp: Unn doo soll ich mir koo Gedonke mache? Dess iss ferr mich koon Frieling, wenn koo Omsel mehr singt.

Hannes! De Hubert konnt nimmi on sich halle: Hannes! Die Welt hält den Atem an und du erzählst mir was über Amseln. Das muss ich mir nicht anhören, ich geh' jetzt nach Hause und mach den Fernseher an. Ich will wissen, wie es mit dem Krieg weitergeht.

Machs gut, Hubert, awwer noch en Aacheblick, ich sach derr, warum ich von dem gonze Kriech nix wisse will: Enn Freund von mir hott mir verzehlt, dass vor soim Enkelche - dess Kind von soiner Tochter, die en Amerikaner geheirat hott unn mett ihm unn ihm Bubche in Amerika lebt -, dass vor soim Enkelche in de Schul e onner Schulkind ausgespuckt hott! Unn warum? Weil soi Mutter e Deutsche iss unn weil mir Deutsche nit mett de Amerikaner in de Kriech ziehe.

Naa, saach ich weider, ich will von dem Kriech nix wisse: De oone spuckt aus unn de onner verzeiht dess dem nie! Unn mett Hass, lieber Hubert, fengt jed kloo Scharmützel unn jeder große Kriech oo, unn die Feindschaft erzeucht widder Hass – unn so weider unn so weider ...

Dann sach ich noch: Horch, Hubert, die Omsel, unn mach moi Aache widder zu.

Eiern Honnes